

Idem: Sanguinem Christi sub specie & sapore vini potamus. Das ist/ Wir trincken das Blut Christi vnter der gestalt des Weins/ etc. Aug in senten. Prosper.

Wie denn auch zwar solche art zu reden / in Göttlicher heiliger Schrift/ Neues Testaments gegründet / vnd daraus / zweifels ohne/ genommen. Denn wenn S. Johannes sagt: Das Wort ward Fleisch/ erkläret er solche Rede dergestalt/ das Wort wohnet vnter vns. Johan. I. v. 14. Vnd S. Paulus Coloss. 2. v. 9. schreibt: In Christo wohnet die ganze volle der Gottheit leibhaftig. Item Actor. 10. v. 38. Christus hat wolgethan allen / die vom Teufel vberweltiget waren. Denn Gott war mit ihm/ etc.

Johan. 1.  
Coloss. 2.  
Actor. 10.

Diß/ M. Seele/ hastu beyin dritten vorgenommenen Püncklein mit fleiß zu betrachten.

**D** HERR Jesu Christ/ du Sohn des leben/ Gebet.  
digen Gottes/ der du deinen heiligen wahren Leib vnd Blut/ im H. Abendmal mir zu essen vnd zu trincken befohlen hast. Sich bitte ich von Herzen: Verleyhe mir deine Gnade / daß ich diesen deinen heiligen Befehlich gehorsamlich folge/ vnd an deinen Worten im geringsten nichts zweifele / sondern gewiß glaube / daß ich Mit/ In vnd Vnter dem gesegneten Brode vnd Wein/ dein thewerbares fleisch vnd Blut / wiewol auff eine hohe/ vnd allen menschlichen Sinnen vnbegreifliche weise/ doch warhaftig/ mit meinem Munde esse vnd trincke. Gib mir auch deinen H. Geist/ daß ich zu diesem deinem heiligen Tische einen wahren Glauben mitbringe: vnd dadurch deinen H. Verdienst vnd alle Wohlthaten/ so du mit deinem Leib vnd Blut mir erworben hast/ mir appliciren vnd zueignen möge: Nicht zweifelende / du habest auch deinen H. Leib für mich dahin gegeben/ vnd dein Blut für mich vergossen/ zur Vergesung aller meiner Sünden. Auff daß ich also dieses deines H. Brautmals recht vnd würdiglich zu meiner Seligkeit/ genießsen möge/ Amen.

XXXX ij

Vom